

EKALESIA FAAPOTOPOTOGA KERISIANO I AMERIKA SAMOA

OFISA O A'OA'OGA KERISIANO



VASEGA FEOLOLO



AUKUSO - TESEMA

2023

FAASOLOGA O MATAUPU

ASO SA: AUKUSO 6, 2023

MATAUPU: O LE AMIO MAMA

TUSI FAITAU: MATAIO 11:25-30

SINI: Ia malamalama le vasega ia atagia ia latou amio le alofa faatino ma le loto maulalo

FESOASOANI MO FAIAOGA

Talofa lau susuga le faiaoga ae a le feagai ai ma tiute ma faiva o lena tausaga aoga ua tuana'i atu.

Talitonu o loo manuia mea uma i le alofa ma le agalelei o le Atua. O le mataupu o lenei Aso Sa o le **Amio Mama**. Faasoa i le vasega ni auala e faatino ai le alofa ma le loto maulalo. Ia malamalama le vasega ia tu ma ola ai i lenei amio, o le alofa ma le loto maulalo.. O a faatinoga ma gaioiga e atagia ai le amio a le tamaitiiti ma ua faataua ma ola i le alofa ma le loto maulalo.

O le a le amio? O tu ma aga e faatino e le tagata, e ese'ese amio faaalua auā e ese'ese falea'oga ma siosiomaga e ola ai le tamaitiiti. O uiga ma faatinoga e iloa ai le amio a le tamaitiiti. O le amio foi e a'oa'oina ai e matua fanau i mea lelei ai le olaga o le tamaitiiti. Ae maise ia atagia ia latou amio le alofa, e faatino i tagata o lo manaomia le fesoasoani. Ia talia ma le loto maulalo tiga pea o'o mai puapuaga. A o ina lului mai faafitauli ma faigata, o isi ia o auala e faatino ai le alofa ma le loto maulalo. Fesoasoani i e ua mafatia i ma'i ma le loto tiga .

O isi ia a'oa'oga a Iesu i ona so'o, ia atagia ia latou amio le alofa ma le loto maulalo e fesoasoani ai e o loo mafatia i ma'i ma puapuaga. O le faamalologa a Iesu o ma'i sa mulimulita'i ai le au soo ia Iesu lea amio alofa. Manatua e ese'ese uma amio o so'o a Iesu, ae ua a'oa'oina e Iesu latou ina ia maua se amio uiga ese e tusa ma le finagalo o le Atua. Fetala'i Iesu “(f28) *Ia outou o mai ia te au, o outou uma o e tigaina ma mafatia i avega o au foi e malolo ai outou*” o le aano atoa lena o le faamoemoe o Iesu i ona so'o. Ia tino mai *latou* amio i le alofa faamaoni e faatino le finagalo o le Atua. Ia a'oa'oina ma ia ola ai pea ma faatupulaia lenei amio i tagata uma e faatuatua i le Atua.

A'OA'OGA

Ia a'oa'oina fanau i le amio alofa ma le loto maulalo. Faatino le alofa i e o manaomia le fesoasoani. Maua le loto maulalo e talia ai faigata ma faaatupuina le alofa. Alofa le lua te tuaoi, fesoasoani ma faalia le alofa i e matitiva.

GALUEGA FAATINO

- 1) Saunia nai fesili faamanatu ai mataupu
- 2) *Pese* * le alofa o le Atua e ofoofogia

Manuia le tapenaga i lau susuga

ASO SA: AUKUSO 13, 2023

MATAUPU: FAAMAONI SE'IA O'O LE TAUNUUGA

TUSI FAITAU: SALAMO 43

SINI: Ia malamalama le vasega, e taua le faamaoni, e faaeaina ma le manuia mai le Atua

FESOASOANI MO LE FAIAOGA

Faaatalofa atu i lau susuga i lenei taeao, manatu ua maua se faasiliga malosi i fanuga lelei i le alofa ma le agalelei o le Atua. Ae taumafai e tulituliloa le tatou mataupu i le taua o le faamaoni se'ia oo le taunuuga, o lea se taunuuga e atagia i le tamaitiiti e faamaoni. E iai le taua o le faamaoni, o lo taoto

ai le finau ma le le fiugofie e feagai ma faigata. O le taua o le ola faamaoni, o le faaeaina ma le soifua manuia.

Faamaoni o se faiva e ese le faigata ona faatino, ona o le tele o faaososoga, ao na faaososoga o lo ia te oe le filifiliga tatau, e fai ma luitau o lou faamaoni. O a lava faigata ma faamoemoega o lo o feagai ma le tamaitiiti o lo tauivi ai, o le faamaoni le mea taua, e ao ona faatino. O le faatinoga o le faatonuga e iloa ai le faamaoni o le tamaiti.

Faaeaina, o le ausia lea o tofi maua lauga, o le tofia i se tulaga maua lauga, po'o le tofia i tofiga o galuega, pei o le pule o le galuega, fai mai le mau a Mataio (25:21) "faamaoni i mea iti, e pulea mea e tele". taunuuga o le pule, ona o le faamaoni. Pe ititi pe tele o le taua ia faamaoni lau taumafaiga sei oo le taunuuga.

O le Salamo o loo taoto iai le tatou mataupu, o le Salamo a Tavita e vivii ai le Atua, i lona faamaoni i lana tausiga. Sa faamaoni le Atua i le puipuiga o Tavita sei oo ina avea ma tupu o Isaraelu. E ui na lamatia si ona ola e tagata ma ona fili, ae le'i tuulafoaina e le Atua Tavita, e ui e lei faamaoni Tavita, ona o le tele o le tuinanau ma le faaososoga i lona olaga. Peita'i e lei ave'esea e le Atua lona faamaoni na tauto ai e avea Tavita ma tupu. O le faaeaina lena o Tavita mai le Atua.

A'OA'OGA

Ia manatua, ia faamaoni i taimi o meaa'oga, aua le fiugofie, aua foi le taiga i faaososoga, e lepetia ai le taumafaiga. Ae le na'o meaa'oga, faapea foi feau, o tusiga o matua, o galuega ua tofia ai, mea uma e ao ona faalia ai le faamaoni. Ia tumau le faamaoni sei oo le taunuuga, ona pine lea o faamanuiaga mai le Atua ae le gata i lea o le faaeaina i tofiga o nuu ma ekalesia atoa ai ma aiga.

GALUEGA FAATINO

- Tusi se tala na pine ai lona faamaoni
- Saunia nai fesili faamanatu ai le mataupu

Manuia le tapenaga i lau susuga ia faia ma lou faamaoni

.....

ASO SA: AUKUSO 20, 2023

MATAUPU: O LE MATA'U I LE ATUA

TUSI FAITAU: FAATAOTO 1: 1-7

SINI: Ia malamalama le vasega o le ola a'oa'oina e maua ai le potu mai le Atua

FESOASOANI MO FAIAOGA

Soifua manuia i lau susuga le faiaoga, talitonu ua maua se faasiliga malosia ao malolo mai foi i feau ma galuega o lena vaiaso. Ae o le tatou mataupu i lena taeao o le mata'u i le Atua. Manino a le mataupu "o le mata'u i le Atua o le amataga lea o le potu".

O le potu e a'oa'oina, mafua le potu aua ua a'oa'oina. Le taua lena o le ola a'oa'oina o le tama ma le teine, ina ia maua le potu. E a'oa'oina mai i lona laitiiti sei oo ina matua. A'o fea e amata mai ai, talitonu e amata mai i totonu o le aiga. Faata'ita'iga, a faatonu e matua fanau i feau ma amio e fai e tatau ona faataunuu lelei. E iloa le potu o le tamaitiiti, ona o loo faalogo ma usitai i le faatonuga atoa ai ma le faamasani e ola ai. O auala ia e faalauteleina ai le potu, ina ia tupu pea le potu pei ona manino i le Faataoto 1:5.

O matua o faiaoga muamua o le tamaitiiti, ae lei o'o i le aoga palagi. E a'oa'oina e matua fanau i le tautala, tu ma le savali. O le masani a matua e oo le afiafi e valaau le fanau i taimi o faigalotu. A masani e le toe tau valaauina tamaitiiti, o le faamasani foi o tamaitiiti i le lotu ma le aoga aso sa, e a'oa'oina ai i latou i tala o le Tusi Paia. Ina ia latou popoto ma matata'u i le Atua e ona le ola.

O le faataoto pei ona faitauina, o loo talanoa ai Solomona i le potu ma ia a'oa'oina e atamai ai. O le mata'u i le Alii o lo'o taoto iai le potu ma le faautauta. O le uiga o le manatu e faalagolago le potu i le mana o le Atua, e fesoasoani i taumafaiga. O aupega o le potu o le faalogo ma le usita'i atoa ai ma le faalagolago i le mana o le Atua, ona maua lea o le potu ma le faautauta. O Solomona o le tagata ua lauiloa i le potu, ae sa faigata ia te ia lana faaiuga i le faamasinoga o fafine ma le pepe. Peita'i sa faalagolago Solomona i le mana o le Atua, na te tatala lona mafaufau e fai iai lana faaiuga. O Solomona sa potu ma le faautauta, tele mea ua ia iloa sa a'oa'oina mai ai, ma sa faalateleina ai lona atamai.

A'OA'OGA

Ia fiafia le fanau i le a'oa'oina, na te maua ai le potu. Na o le Atua e maua ai le potu ma le faautauta. Faalogo ma usitai i matua o le falea'oga muamua,

GALUEGA FAATINO

- Tusi ma tauloto le *Faataoto 1:7*
- Pese * *Faalogo ma Usita'i e leai se isi ala, e fiafia Iesu*

Manuia le tapenaga i lau susuga

FESILI O MATAUPU

ASO SA: AUKUSO 27, 2023

1. O le a le uiga o le amio sa talanoaina I le vasega?
 - O tu ma aga o faatinoga a tagata e iloa ai le amio.
2. O a mea e lua sa talanoaina ia atagia i le amio a le tamaititi?
 - Alofa faatino ma le loto maulalo
3. O a uiga ma faatinoga o a'oa'oina ai e Iesu I ona soo?
 - Amio alofa ma le loto maulalo e fesoasoani I e matitiva.
4. Tusi tauloto mai le Mataio 11:28
 - "Ia outou o mai ia te a'u, o outou uma o e tigaiga ma mafatia i avega, o a'u foi e malolo ai outou"
5. O le a le mataupu o le aso sa Aukuso, 13, 2023
 - Faamaoni se'ia o o le Taunuuga
6. Aisea e taua ai le faamaoni?
 - Aua e faaeaina ai ma le manuia mai le Atua.
7. Faatumu le laina
 - *Faamaoni* mea iti'iti ,na te *Pulea* mea e tele.
8. O le a le tusi faitau o le mataupu "faamaoni se'ia o'o le taunuuga?"
 - Salamo 43
9. Tusi tauloto mai le Faataoto 1:7

- “O le mata’u i le Atua o le amataga lea o le potu, ae inoino le tagata valea i le potu ma le a’oa’oina”

10. O le a le mealofa a le Atua ia Solomona?

- O le potu ma le faautauta.

Ia manuia le alo atu i suega o lenei Aso Sa

Tatalo: Faafetai tele le Atua I lou mana, I lou mafuta mai a’o matou faasoa ma a’oa’oina tala o lau Afio, ina ia ta’iala ai lo matou ola e tusa ai ma lou finagalo ma taiala ai lo matou ola faatuatua I lau Afio I aso uma. Amene.

ASO SA: SETEMA 03, 2023

MATAUPU: IA AVEA MA AVE FEAU O LE TALALELEI

TUSI FAITAU: MATAIO 26: 6-13

SINI: Ia malamalama le vasega ia avea i latou ma auauna o le Talalelei

FESOASOANI MO FAIAOGA

Le faaititia le agaga faafetai i le alofa ma le agagalelei o le Atua. Faafouina lo tatou malosi ae a tiute ma faiva o feagai ai. Talitonu o lo o manuia foi outou susuga i faiaoga, avea ia lenei Aso Sa e fai ai outou ma ave feau o le Talalelei mo le fanau o le aoga aso sa. Ae amata le faasoa i nai tala o le taunuu mai o le talalelei. Ae o nai fesoasoani ia mo lau susuga mo le tatou mataupu.

O le aso sa o le Talalelei, manatu e auga tonu i le tala faasolopito o le taunuu mai o le talalelei ia Iesu i Samoa. Manatu e ao ona faamanatu ma faasoa i le vasega nai vaega taua o le talalelei ma lona taunuu mai. O le tausaga 1830 na to’ai taunuu ai i Sapapali’i le talalelei i Samoa, a’o o Leone i Amerika Samoa. O Ioane Viliamu ma Papu Fauea sa ave feau o le Talalelei. O Malietoa Vainuupo sa talia le talalelei ma avea ai Samoa ma tagata kerisiano. O pine faamau o nei tala o maa faamanatu o lo i totonu o nei afioaga. O le fesili o le a le talalelei na o mai ma nei misionare o le tali, ***o le talalelei ia Iesu keriso.***

O le tala sa faitauina o le fafine ma le fagu alapasa, na u’u ai vae o Iesu. Ae sa avea ma faafitauli o le au soo. Sa manatu le au soo i le taua o le fagu ma lona manogi, e sili ai pe ana alu e faatau maua ai se seleni ma tufa atu i e matitiva. A e ese foi le vaai a Iesu, o lo vaai Iesu i le tagata ma lana galuega lelei po le auaunaga. O le galuega lelei lena sa fai e le fafine sa u’u vae o Iesu le u’u manogi (alapasa) ae solo i lona lauulu. O se galuega e le lelei i le vaai i le au soo, ae taua ia o le feau sa aumai e Iesu. Sa faamanatu e Iesu i ona soo, o le mea taua o le galuega lelei a lenei fafine e manatua ai pea ia i lana galuega lelei sa faia mo ia. O le auaunaga a lenei fafine sa faatino, ua maitauina ai le feau mo le au soo. O le feau lena a Iesu i ona soo, avea i latou e taimua le faia o galuega lelei. E ala le faamalologa o mai ma fesoasoani i e matitiva, ae maise ai ia mau lo latou faatuatua i le Atua. O soo a Iesu ua avea i latou ma ave feau o le talalelei ia Iesu i le lalolagi atoa. Ua manatua ai foi latou ona o le talaina o le talalelei ia Iesu.

Aoaoga

Mo le fanau ia avea latou ma auauna e fai ma feau o le talalelei. O le auaunaga le mea taua, po le galuega lelei. O a lava galuega ua e iloa e tataua ona fai, o lau auaunaga lena, fai le mea ia maitauina ma le lelei. O galuega e maitauina ai lou tamaititi i aso uma o lou ola.

GALUEGA FAATINO.

- Faatino le galuega a le fafine, (u’u vae ma solo i le lauulu)

Manuia le Aso Sa o le Talalelei

ASO SA: SETEMA 10, 2023

MATAUPU: IA MATAALA I TALALELEI ESE

TUSI FAITAU: KALATIA 3: 3-9

SINI: Ia malamalama le vasega mataala ia aua nei faaseseina i faaososoga

FESOASOANI MO FAIAOGA

Malo le soifua maua, malo foi le faatoatoa i lau susuga i le faiaoga manatu ua maua se faasiliga malosi. Ae o lenei aso sa o le mataupu e faasoa ma le manino le mataala i le fanau ona o faaososoga ina ia aua nei se’e gofie ai o latou loto. Ae mafaufau toto’a ina ia aua nei seetia gofie i faaososoga. Ae manatu ave le faamuamua e faasoa ai ma le vasega e tau faamalamalama upu taua ia o le mataala ma le faaososoga.

Mataala e lua upu o lo fafau ai, o le mata ae ala maua ai le upu mataala. O lona uiga ia vaai toto’a, nofo uta, magafagafa i mea o lo mafaufau ai. O le faaososoga sau mai le upu faaoso, faalata, faatosina, faatauana, liliu. Faaososoga o se auala faatogafiti ina ia maua ai le manaoga o le tagata faaososo. E iai ona itu lelei ma e iai foi ona itu leaga, ae pei e ma tele i le itu leaga. O le mea lea e ao ona silafia e tamaiti ia mataala i taimi o faaososoga.

Tele tala o le tusi paia o loo iai le faaososoga, pei o Iesu i le vao sa faaososoina e satani. O Eva ma Atamu sa faaososo e le gata (snake). Tala sa faitauina o le tusi a Paulo i le ekalesia i Kalatia, ua liliu le tele o le ekalesia i faaososoga mai i isi talaiga ese mai le talaiga o le faatuatua ia Iesu keriso sa talaina e Paulo. Manatu a Paulo ua fulitua le toatele o le ekalesia i Kalatia, ua manatu i le faaletino ma le tulafono ao fea le faatuatua. Faamanatu a Paulo ia Kalatia “faapei o Aperamo na faatuatua i le Atua”, ua ta’ua i tatou o le au faatuatua. E manuia nuu uma ia te ia, le ala lea na faalatele ai e Paulo ma faapea mai, ina ia oo i nuu ese le manuia o Aperamo ia Kesriso Iesu ma ia tumau i le fasatuatua, o le Agaga lea. Tele faaososoga i le ekalesia i Kalatia ua mafuli ai tagata e le gata i le tulafono ae o talitonuga ua tauseseina ai e ala i tapuaiga ma le ola faatuatua.

A’OA’OGA

Ia ola magafagafa le fanau i le tele o suiga i lenei vaitau, ua tele foi faaososoga ua vave ai le ola tuinanau o fanau. Ae galo ia i latou o le Atua e ave iai le talitonuga ma le faatuatua ia moni. Tele faaososoga e mafai ai ona taiga ai o latou olaga ma lepetia ai o latou ola faatuatua i le Atua. O le mea lea ia mataala ona o faaososoga.

GALUEGA FAATINO

- Saunia se pese talafegai

Manuia le tapenaga i lau susuga

ASO SA: SETEMA 17, 2023

MATAUPU: IA OLA FAALAGOLAGO I LE ATUA

TUSI FAITAU: I SAMUELU: 17: 44-47

SINI: Ia malamalama le vasega ia ola faalagolago i le Atua i taimi o faigata.

FESOASOANI MO FAIAOGA

Ia i le Atua poto le viiga ma le faafetai i lana pule faasoa ona o le malosi ma le manuia sautualasi iai tatou. Ae manatu o se avanoa lelei lea e faafetai ai lau susuga ona o tiute ma faiva, ae o le tatou mataupu o le ola faalagolago i le Atua.

Ia faamanino i le fanau le ola faalagolago i le Atua, aua e iai le taua i le itu faaletino ma le faaleagaga. Faataitaiga o le tamaitiiti a'oga e faalagolago i ona matua e faatino meaa'oga (peni, api, vase, etc...) ae faalagolago i le Atua ia faamalosi e fai meaa'oga. O le ola faalagolago i le Atua na te aumaia le mana e faamalosi i le agaga na te faatinoa le manaoga faaletino. Peita'i o taimi faigata lava e tatou te faalagolago ai i le Atua. Aua o taimi ia e o'otia ai lagona, ona saili lea po fea e tatou te maua se filemu. O le Atua e ave iai le ola faalagolago i mea uma e puapuagatia ai le tagata. Ae aua nei galo ia faalagolago i le Atua i taimi uma.

O le tala i le tatou mataupu, o le tala masani, o Tavita ma Koliata. Ae taua i le tatou mataupu i lenei aso Sa. O le taua a Tavita ma Koliata o loo manino a mea o loo faalagolago iai o la loto. O Koliata o lo'o faalagolago i ana mea tau matautia, o le pelu ma le tao, atoa ai ma lona malosi ma le tino masomasoa. O Tavita o se tamaititi ao fesagai ma Koliata. Ua iloa e Tavita le matautia o Koliata ma ana au, o mea tau a Tavita o le maata ma le maa. Peitai sa faalagolago Tavita i le Atua na te tau le taua mo ia ma Isaraelu. O se taimi faigata lea mo Tavita le feagai ai ma Koliata. Fai mai Tavita e te sau ia au le pelu ma le tao, ae ou te alu atu ia te oe i le Suafa o le Alii. Manino a le ola faalagolago o Tavita i le Atua. Tuumumusuina e le mana o le Atua Tavita na te maua le toa i lona loto e tau ma Koliata. Manino a le tala, na fano Koliata ma Filisitia i lima o Tavita ma Isaraelu.

A'OA'OGA

Taua ia lo tatou ola faalagolago i le Atua, aemaise a taimi e tatou te feagai ai ma faigata o le olaga. E feagai loa ma faigata e felavasa'i solo le mafaufau po fea e saili ai le mapusaga, o ina e tatou te ole atu ai i le Atua. O lona mana e finauina o tatou loto, ina ia tau le taua lelei. O tiute ma faiva, o meaaoga, ma galuega ua valaauina o luitau o le ola, ae faalagolago i le Atua e maua ai le manumalo.

GALUEGA FAATINO

- Sauni le pese.... faalagolago, i aao o Iesu

Ia manuia le tapenaga i lau susuga i le faiaoga

FESILI O MATAUPU

ASO SA: SETEMA 24, 2023

1.O le a le mataupu o le aso sa o Setema, 03,2023?

- Ia avea ma ave feau o le talalelei

2.O le a le tala o loo tusi o Mataio 26: 6-13

- Iesu ma le fafine ma lana fagu alapasa

3.O le a le tausaga na taunuu ai le talalelei i Samoa

- 1830

4.O le a le galuega sa fai le fafine ia Iesu

- Sa uu vae o Iesu i le fagu alapasa ae solo i lana lauulu

5.Aisea e taua ai le mataala I faaososoga?

- Ina ia aua nei taiga ai tatou I mea sese.

6.O ai na faaososoina Iesu I le vao?

- O Satani

7.O le a le ulu tala o le aso sa Setema,10,2023

- Ia mataala i Talalelei ese

8.O le a le tala o loo i le (I Samuelu 17,2023)

- O le taua a Tavita ma Koliata

9.Faatumu laina nei

- “E te sau ia te au i le PELU ma le TAO, ae ou te alu atu ia te oe i le Suafa o le Alii.

10. O le a le ulutala o le aso sa o Setema,17,2023

- *Ia ola faalagolago i le Atua*

Ia manuia le alo atu I suega o lenei aso Sa

Tatalo: Faafetai le Atua I lou alofa ma lou agalelei tausii mai. Le ola ma le malosi ua faafouina e tatou te mafuta ai pea I aso uma. Le Alii e, faafetai I lau pule faasoa ua taitaiina mai ai lau fanau I lenei aso manuia ai mea uma I le alofa ma le filemu...Amene

NOVEMA 05, 2023

MATAUPU: TUMAU LE OLIOLI I LE ALII

TUSI FAITAU: SAPAKUKA 3: 16-19

SINI: Ia malamalama le vasega ia faatumau lo latou fiafia i le ola faaleagaga

FESOASOANI MO FAIAOGA

E le faaititia le agaga faafetai i le Atua ona o lona alofa ma lona agalelei ua taitai mai lo outou soifua ma le ola, aea faiva ma tiute o feagai ai. Ia tumau ia te ia le viiga e le aunoa. Manatu ua maua se faasiliga malosii mai le malologa o le masina o Oketopa aua le tapenaga o le lotu o tamaiti. O le tatou mataupu i lenei aso sa, o le faatumauina lea o le ola o fanau ia fiafia i le ola faaleagaga. Ae manaia pea amata i se faatalanoaga i le mea e fiafia ai le fanau.

O le a se fiafiaga tele o lea tamaitiiti? Talitonu e ese'ese uma mea e fiafia ai lea tama ma lea teine. O isi e fiafia i le pese, o isi o siva, o taaloga etc. Ae o le agaga lea e fia tuliloaina o le itu faaleagaga. Pei o viiga o le Alii e ala i pese, o siva faaleagaga, o le tatalo, faitauina o le tusi paia ae maise le fiafia i le lotu. O le tupu ae o le fanau i nei vaiata ua tosina o latou ola i le tele o mea e lepetia ai o latou soifua. Aua nei taiga atu ai o latou ola i mea leaga o le olaga, pei o fualaau faasaina, o ava oona pei o mea ia ua fiafia tele ai o latou loto ma tumau ai le fiafia. Ae le fiafia i le itu faaleagaga, o le o le lotu, mafutaga faaautalavou, o le aoga aso sa, mea uma tau i le Alii. E tele ina matutua tamaiti ma tosina atu lava i mea o le lalolagi, ao galo ai le Atua e tatau ona tumau ai lo latou fiafia ma le olioli. O taimi faigata ia o tupulaga e luluti mai ai faafitauli ma faigata i le olaga o fanau

O Sapakuka o ia o le perofeta, ua iloa e Sapakuka le a oo mai le toilalo o Isaraelu i le malo o Papelonia. Ma o le a avea ma ala o le a tosina ai le talitonuga i atua ese, ma avaga atu ai Isaraelu i amio faapaupau. E ui lava i lona fefe i le ta'u faamata'u o Papelonia, ae lei ave'esea ai lona talitonu i le Atua. O lona fiafiaga tele o lona faatuatua e tumau i le Atua. O le mataupu lenei o lona faatuatua i

le Atua ua maua ai le malosi e mafai ai ona maua le olioli tusa lava po a faigata ma faafitauli e o'o mai ia Isaraelu.

A'OA'OGA

Ae o le faamoemoe o a lava fita ma faigata e feagai ma i tatou ia tumau lo tatou olioli i le Atua. Ia mamao le fanau ma mea e tosigā le ola aua e tupu mai iai faafitauli ma faigata i fanau. Ae tatau ona fiafia ma olioli o latou loto i le Alii. Ia mafuta atu i le aoga aso sa, au talavou, au faipese, etc. O ala ia e tatau ona taiga mai iai o latou ola mo le Alii.

GALUEGA FAATINO

- Fili ni tamaiti e fiafia i pese, siva, ma tala, etc. e faatino ia vaega (faapese toatasi, etc.)

Ia manuia le tapenaga i le faiaoga

ASO SA: NOVEMA 12, 2023

MATAUPU: O LE ATUA FOAFOA

TUSI FAITAU: SALAMO 127: 1-5

SINI: Ia malamalama le vasega o le Atua na foafoaina mea uma e fausia ma faavae ai aiga.

FESOASOANI MO FAIAOGA

Soifua maua ma le lagi mama i lau susuga le faiaoga. Manatu o lo manuia tutusa i tatou i le alofa ma le agalelei o le Atua. O lana pule faasoa ua tatou aea ai nei i manu ae le o mala. O le mataupu o lenei aso sa, o le Atua foafoa. O foafoaga o mea uma lava na saunia e le Atua, atoa ai ekalesia, nuu, ma aiga. O le faamoemoe o lenei mataupu ia iloa e le fanau o le Atua na maua ai le potō ma le malosi e osi ai aiga. O le aiga e faavae i le Atua. O le uiga o le manatu, a le iai le Atua i se mafutaga faaleaiga o se aiga feagai ma faafitauli. Ia iloa foi e le fanau o le Atua na auina mai le malosi ma le ola ia i latou.

O le Atua na foafoaina mea uma mo le tagata, o le sami, ma le lauele'ele ua faamanuia mai iai le Atua. O foafoaga ia a le Atua ua uma ona tapena aua le soifua tausi a tagata i le itu faaletino. Na foafoa foi e le Atua le tagata, ma tuu iai le agaga ma le mafaufau ina ia iloa ola magafagafa. O mea ia sa tausi ai aiga, ae talitonu ma le faatuatua i le Atua e tauia o tatou tagata i le manuia.

O le Salamo 127 o le tusi a Tavita mo Solomona e faailoa ai o le Atua e foafoa o mea uma mo tagata. O Solomona na filifilia e le Atua e fauina le malumalu. O lona manatu o a uma mea tatou faia ia muamua ona tatou ole atu i le Atua mo lana puipuiga ma le saogalemu. Aua a le senoa le Atua e puipui ia i tatou tatou te le maua le saogalemu. Ae faaii lana tusi i fanau aua o latou o tofi o nuu ma aiga, o le fanau foi o le meaalofa a le Atua. E faapelepele e matua fanau ma tausi lelei sei oo ina matua.

A'OA'OGA

Ia iloa e le fanau o le Atua na faia i tatou, atoa ai ma le lalolagi. Na foafoaina e le Atua mea uma mo le tagata, o manu, o figota o le sami, ma laau o le vao. Sa foafoaina e le Atua mo tausi o tagata. E oo foi i le malosi ma le ola sa tuuina e le Atua i fanau, ia mamafa i latou mafaufau o le fanau o le meaalofa a le Atua mo aiga ae maise matua. Aua o latou o tofi o nuu ma aiga, e faalagolago iai aua le tausi o aiga, ae faamoemoe lava matua, ia faalagolago ma faavae o latou faaiuga ma tonu i le Atua, ina ia lelei ma maopopo aiga.

GALUEGA FAATINO

- Saunia se pese... Tamaloa potō fau le fale i luga le papa

- Faaoga nai ata e valivali pe tusi se ata o se aiga

Manuia lau tapenaga lau susuga i le faiaoga

ASO SA: NOVEMA 19, 2023

MATAUPU: O IESU LE TALI

TUSI FAITAU: MATAIO 8: 23-27

SINI: Ia malamalama le fanau o Iesu o le tali pea feagai ma taimi faigata.

FESOASOANI MO FAIAOGA

Manatu o manuia lau susuga i le alofa ma le agalelei o lo tatou tapa’au i le lagi. Maua foi se malologa mai i feau ma galuega, aea lo tatou valaauina i le Atua ma lana galuega. Ae manatu o nai motuga afa ia e fesoasoani i au tapenaga ma le tatou mataupu. Ia malamalama le fanau a feagai i latou ma faafitauli o Iesu lava le tali. Aua ua tele ina manatu le fanau o le oti a le tali. Tautala foi ma le ava, o le pule le ola, sola ese mai le aiga, ma isi mea pei o le faaoga o fualaa ma vailaa faasaina ua matele ai a latou faaiuga. Ae ia manino i o latou mafaufau, o Iesu e maua ai le tali, o latou faafitauli. Ua tatou iloa le fanau i nei vaitau ua faigata, ma ua tele foi a latou faafitauli. Ae maise ai i totonu o aiga i le va o matua ma fanau. Ua tau leai se faaaloalo, ae ua tele foi na tuulafoa’i fanau mai i mafutaga o autalavou ma aoga aso sa, faapea aufaipese. O mafutaga ia e fafaga ai o latou ola i le upu a le Atua ma le ola faaleagaga. Toatele le fanau ua malosi o latou ola i le fualaa ma vailaa faasaina, ma ua faigata ai o latou olaga. (*Atonu o le aoga lea o si tatou pito laau*) faamalamalama i fanau le faamoemoe o aoaoga a Iesu ina ia maua’ a le faatuatua. O le faatuatua ua moni ia Iesu Keriso e tali o tatou puapuaga. O a faafitauli e feagai ma fanau i totonu o aiga ma le ola tosina i le lalolagi, a le saofia le ola i le Atua ma le faatuatua ia moni. E afatia lava fanau i faafitauli ma iu atu ai i puapuaga

O le tala masani, ina ua afatia ma osofia e peau o le sami le vaa sa malaga ai Iesu ma ona soo. Sa avea ma popolega ma le fefe i le au soo. O le fefe e iloa atu o le oti le mea o le a oo mai, fua i le tala le au soo, “*faaola mai a matou fano*” peitai o lo moe pea Iesu. Sa ala Iesu ma faapea ia i latou; “*aisea ua outou matata’u ai, outou faatuatua itiiti*”? O ina na iloa ai e itiiti lava se faatuatua o lo’o i le au soo. O le faafitauli lea o le au soo, e mulmuli i aoaoga a Iesu ae le faatuatua. Ina ua vavao e Iesu le matagi, sa ofo le au soo. O le to’a o le afa ma le vai, o le ata atoa lena, o Iesu le tali o faafitauli.

A’OA’OGA

Ia malamalama le fanau e oo ia latou le fefe ma le popole, pea feagai ma faafitauli ona le mautonu lea i se faiuga e fai. Ae ia latou iloa a faatuatua i le Atua na te maua foi le to’a ma le filemu i lona olaga.

GALUEGA FAATINO

- Faatino le tala Iesu ma soo i luga le vaa.
- *Saunia se pese talafeagai...O keriso i lou va’a ou te ata’ata i le afa*

Ia manuia lau tapenaga i lau susuga le faiaoga.

FESILI O MATAUPU

ASO SA: NOVEMA 26, 2023

1. O le a le ulutala o le aso sa o Novema 5, 2023?
 - Tumau le olioli i le Alii
2. O le a le tusi faitau o le mataupu o Novema 5.2023?
 - Sapakuka 3:16-19
3. O ai Sapakuka?
 - O le perofeta.
4. O le a le ulutala o le aso sa o Novema 12, 2023?
 - O le Atua foafoa
5. O le a le tusi faitau o le aso sa Novema 12,2023?
 - Salamo 127
6. Tusi tauloto mai le Salamo 127: 1
 - Afai e le atiinae e le Alii le fale, e galulue fua i latou.
7. O le a le meaalofa a le Atua i le Tupu o Solomona?
 - O le poto.
8. O le a le ulutala o le aso sa o Novema 19, 2023?
 - O Iesu le tali.
9. O le a tala o le tusi o Mataio 8: 23-27?
 - O le vavaoina o le matagi.
10. O fea na iai Iesu ao agi le matagi?
 - O lo o moe i totonu o le va'a.

Tatalo: Faafetai le Atua i lou alofa ma lou agalelei tausii mai. Le ola ma le malosii ua faafouina e tatou te mafuta ai pea i aso uma. Le Alii e, faafetai i lau pule faasoa ua taitaiina mai ai lau fanau i lenei aso manuia ai mea uma i le alofa ma le filemu...Amene

Manuia le alo atu i le faiga suega o lenei asosa.

ASO SA: TESEMA 03, 2023

TUSI FAITAU: 1 SAMULEU 24: 16-22

MATAUPU: FAATOILALO LE LEAGA

SINI: Ia malamalama le vasega o le faatoilalo ina o le leaga, ua e faia se mea lelei.

Lagi e mama ma le soifua manuia lau susuga le faiaoga, malo le faatoatoa. Aua feau ma faiva o feagai ai ae maise foi le malosii faafouina mai le aso Faafetai. Manatu maua ai se malologa aua aso fiafia. Ae o le ta mataupu o lenei aso sa, o le faatoilalo o le leaga. E fua lea fuaitau ona o tatou lagona

ma manatu e faataunuu se mea leaga. O le mea le e ao ona malamalama le tatou vasega ia faatoilalo mea leaga ae manatu i mea lelei.

E iai le upu faasamoa e faapea “*uo uo fofa*” soo se tamaititi lava e iai ana uo, peitai e iai taimi e leaga ai le mafutaga ona iai lea o le tau malamalama i le tasi. Ona o’o lea o lagona ma faaososoga i le mafaufau ona tupu lea o le ita, ina ia fai iai se mea leaga. Peitai o i e tuufesili ai le mafaufau pe fai ai se mea leaga pe leai. O le ita o le mea vave, ae iai taimi e mafai ai ona pulea ale tamaititi lona loto ita. Afai ae mafaufau le tamaititi i le mea lelei, o ina ua iloa ai ua faatoilalo le leaga. O le faatoilalo o le leaga ua iloa ai le manumalo i le musumusuga a le Agaga Paia, aua ua e filifilia le itu lelei.

E faapea se agaga o lo taoto i le tala ia Tavita ma le Tupu o Saulo. O le mafaufau o le Tupu o Saulo e fai se mea leaga ia Tavita, o le oti. Peitai sa maua e Tavita le avanoa e faaoo ai le oti ia Saulo. Ae ua manatu Tavita e leai, aua ua ia manatu o le Tupu o Saulo o le tagata ua faauuina e le Atua. Ua faatoilalo e Tavita le leaga sa ia manatu ai. Ae ua ia silasila i le Atua, lea ua ia manatu ai e le faia se mea leaga. E faapena foi Saulo, sa ia lagona lona salamo ina ua faasaoina e Tavita lona ola.

A’OA’OGA

O le manatu e fai se mea leaga i lou uso po ai lava, ua e filifilia ala o le tiapolo, ae e mafai ona tatou pulea le loto ina ia toilalo ai mea leaga o lo’o faaososoina ai oe e le fili. O le faatoilalo o le leaga ua e faia se mea lelei mo le tagata, ae maise ai ua e faia mo oe lava pe a lagona le salamo.

GALUEGA FAATINO

- Saunia nai fesili faamanatu ai le mataupu.
- Saunia se pese talafeagai
 - Lafo avega ia Iesu a alofa ia te au.

manuia lau tapenaga i lau susuga

ASO SA: TESEMA 10, 2023

MATAUPU: O LE TALALELEI MO TAGATA UMA

TUSI FAITAU: LUKA 4: 40-44

SINI: Ia malamalama le vasega e ola maloloina tagata uma i le afioga a le Alii.

FESOASOANI MO FAIAOGA

Malo le onosai malo foi le galulue toe a ose aga ona taunuu atu lea i aso fiafia o le fanau mai o le Mesia. Ae o le mataupu mulimuli lenei mo lenei foi tausaga. O le ulutala o le Talalelei mo tagata uma, o le talalelei e faatatau ia Iesu Keriso. Mai i lona fanau mai se’i o’o i lona toetu mai le oti, o le talalelei lena mo tagata uma. Ae o le tele o tala ia Iesu o tala e lagona ai le ola maloloina mo tagata uma. O le Afioga a le Alii e maua uma ala o lagona o le tagata. Oa uma mea e tatou matitiva ai i le itu tino ma le agaga, e maua uma tala ia Iesu le feau e maloloina ai. E oo foi i ma’i ma mafatiaga o le loto e maua le fofa ma maloloina le ola ona o le talalelei ia Iesu. O tala foi nei a loloto ai ou mafaufaga pei o se vaimalu i totoga le feau mai le Afioga a le Alii.

Manatu e faapena foi lenei olaga tatou te iai, tele foi a talalelei tatou te faalogo ai mai i o tatou matua e maua ai foi le ola maloloina. Pei o tagata e fofa ua faalogo ai isi tagata fia maua se malologa, tau i ma’i o le tino. O le tagata ma’i la, ua la faalogo i le logologoa ma le tautau’a nei tagata (fofo), ma ia saili ai loa mo se fesoasoani. E faapea foi tagata ua maliluu, e molimau ai tagata i mea lelei sa latou faia. ae o le auga ma le faamoemoe o le ola maloloina ma i le talalelei mai i mea tutupu i le soifuaga.

O le talalelei ia Iesu, ua logologoa ai tagata mama'i ma ma'i ese'ese. Fai mai ua fia pa'i ia Iesu, ona ua fia ola maloloina. Ua oo foi i temoni ua ia tulia i fafo, ma latou alalaga mai "o oe lava o Keriso, o le Alo o le Atua". Ona alu lea o Iesu i le mea tu'ufua, ae o saili e tagata aua ua latou iloa o ia lava o Keriso. Ae o lo o fia malaga Iesu e logo i isi aai e fia tala'i ai le malo o le Atua. Aua o le mea lena sa auina mai ai o ia.

A'OA'OGA

Ia iloa e le fanau, o le maloloina le ola e maua mai i talalelei ia Iesu, o a'oa'oga ma luitau ia o lo taoto i Afioga a le Atua. E faasoa mai foi e matua talalelei o aiga nuu ma ekalesia, e fai ma tala e ola ai, ma savali ai i a'oa'oga. Ae ia faasilisili tala ia Iesu e tatou te maua ai le ola.

GALUEGA FAATINO

- Saunia se pese talafeagai
 - *Faitau le tusi paia ma tatalo i aso uma*

Manuia le tapenaga lau susuga

FESILI O MATAUPU

ASO SA: TESEMA 17, 2023

1. O le a le ulu tala o le tala Tesema, 03,2023
 - a. Faatoilalo le Leaga
2. O le a le tusi faitau o le tala o le talalelei mo tagata uma?
 - a. Luka 4:40-44
3. O ai tagata o lo iai le tala sa talanoaina i le tusi o 1 Samuelu 24: 16-22
 - a. O Tavita ma le Tupu o Saulo
4. O le a le tusi faitau o le tala faatoilalo le leaga?
 - a. 1Samuelu 24:16-22
5. O le a le ulutala o le mataupu o Tesema 10,2023
 - a. Talalelei mo tagata uma.
6. O le a se a'oa'oga o le tala o lo'o le mataupu Talalelei mo tagata uma?
 - a. Ia ola maloloina i Afioga a le Alii.

TALI FESILI NEL... IOE PE LEAI

7. Sa fasioti e Tavita le Tupu o Saulo?
 - a. Leai
8. Sa faamaloloina e Iesu tagata mama'i?
 - a. Ioe
9. Sa tala'i e Iesu le malo o le Atua i le au sunako?
 - a. Ioe
10. Sa alalaga tagata fai mai o Iesu o le Alo o le Atua?
 - a. Ioe

Manuia le alo atu i suega o lenei tausaga

Tatalo: faafetai i lau Afio i lou fatasi mai i lau fanau, ao feagai ai ma le aoga aso sa i lenei vaitau. Ua faaiuina lenei tausaga aoga, o le a matou aga atu i aso fiafia ma faamanatuina le aso fanau o le Mesia. Le Alii e, faafetai alofa faamalo le agalelei mo mea uma. Amene.



Tautua Printing Press
Congregational Christian Church of American Samoa
1 Kanana Fou Street, Box 1537
Pago Pago, American Samoa 96799
www.efkasonline.org